

MUSEGA E MENDRANZES

L ladin ressona sa mont coi Dimonic

La rassegna JMMJ à port sun Ciampac Lucia Kastlunger adum con Judith Geissler e sia band e sun Sèn Pelegrin la furlana Elsa Martin



Lucia Kastlunger con Judith Geissler e i Dimonic sun Ciampac.

L son internazionèl de la musega jazz, pop, funky e gipsy, e l son di lengac talian, todesch, ingleis e ladin, à viventà la piana de Ciampac en jebia ai 25 de messèl dal mesdi per l secondo apuntamento de JMMJ, la rassegna de musega dedichèda a joegn, mendranzes e musega jazz, metuda a jir tel chèder del Fassa Panorama Music da la sociazion de musega e cultura La Grenz vidèda da Enrico Tommasini.

La ciantarina e autora d'Al Plan de Mareo Lucia Kastlunger, adum con Judith Geissler e con i strumentisc del grop Dimonic: Moritz Grùbel al sax, Florian Donaubauer a la tastiera, Chris Kilgenstein a la chitara, Johannes Göller al bas, Matthias Bäuerlein a la bateria e Aron Hantke a la percusions, ge à sport al publich n bel program, en pèrt fora da sie CD Me & You e en pèrt con cianties per ladin, desche «Anima» e «Jore», verscion ladina de «Il volo» che l'é sul CD, e dapò cover de suzesc internazionèl traslaté te nosc lengaz.

L publich à dassen aprijà la ouc, la grinta a la simpatia de la doi ciantarines e la braùra de duc i sonadores, ma ence l'organisazion de La Grenz, la tecnica de Marco Mattia, la prejentazion de Marta Covi e... l temp, che chest'outa à tegnù ge dajan l met a duc de se n jir de retorn pian pian inant che se desveneèr dò l gran ciaut de chisc dis.

I Dimonic sarà amò da poder scutèr te la Val Badia en domenia ai 11 de aost da les 21.00 aló da la utia Lavarela e en mèrtesc ai 13 da les 21.15 a Ciastel Colz a La Ila tel chèder del Festival Badiamusica.

Fassa Panorama Music sporc ampò chisc dis che vegn n auter apuntamento con artistes de Mareo: en jebia ai 8 de aost sun Ciampedie, olache rua la forenada da Vich, se podarà scutèr la sonadora de vidola Angela Palfrader, che adum con

Raffaella Zagni al piano portarà dant l program de musega classica «Non solo tango».

Elsa Martin sun Sèn Pelegrin

La rassegna JMMJ é jita inant en domenia ai 28 de messèl con la musega furlana. L concert con la ciantautora Elsa Martin era en program da mesdi ló dal refuge Baita Paradiso sun Sèn Pelegrin, ma l temp malsegur à spent l'organisazion a l spostèr te l'Hotel Arnika, semper sun Sèn Pelegrin. La sala serèda à fosc permetù de entener e goder amò miec l program, a trac belebon ardi e sperimentèl, che Elsa Martin à portà dant col compagnament de Alessandro Turchet al contrabas e Andrea Ruggeri a la bateria. L'à sport vèlch rielaborazion de vilotes tradizionèles del Friul che con la doura de la tecnica les à ciapà na viesta deldut neva, ma ence vèlch composizion originala neva e vèlch suzess jà cognosciù de l'autora, desche «Dentrifur», da sie prum CD «vERsO».

Elsa Martin à dapò ciantà «Cosa sono le nuvole» en omaje a l'autor furlan de maor nonzech, Pier Paolo Pasolini, protagonist con etres poec del Friul ence del nef CD «Sfueâi» finalist de la Targhes Tenco per la cianties de mendranza e regionèles, e no l'é mencià nience na ciantia per sard: en onor del baterist Andrea Ruggeri, che à sonà ence col mai desmentia Andrea Parodi, Elsa à sport na beliscima interpretazon de «Astrolicamus».

La rassegna JMMJ se serarà sù ai 25 de aost tel teater Navalge con n auter concert de gran livel, avert dai «Disaster» del Sudtirolo e che jirà inant con la ciantautora furlana Silvia Michelotti e sie projet metù ensema con Leo Virgili.

Lucia Gross